

朔方備乘

朔方備乘卷首六

欽定書二

平定羅刹方略二

康熙二十三年正月乙酉

命將軍薩布素等遣官兵勦撫牛滿羅刹

臣秋濤謹案牛滿一作鈕

滿卽與圖之牛滿河也在精奇里江之東

薩布素等奏牛滿羅刹

抵恆滾同來自北海之羅刹與費雅喀戰退居

河洲若不速計勦撫則赫真費雅喀奇勒爾人

民必被殘害且恐羅刹復增發前來宜乘四月

冰解時卽遣夸蘭大二員率官兵三百人并發紅衣礮四具令附近恆滾口費雅喀噶克當阿等嚮道抵羅刹所據地先行招撫不卽歸降則進勦滅如羅刹聞風先遁所發之兵卽乘機安輯赫眞等處人民未經來附者亦招撫之

上報可

二月辛酉

命迭投誠羅刹至京安插 將軍薩布素等奏夸蘭大鄂洛純等今年正月十一日抵羅刹地方遣宜

番等造其居開諭之先取其烏槍二十具并俄

樂春留質之子三人

臣秋濤謹案俄樂春即鄂倫春亦作鄂羅春東北部落之屬於黑龍江者也

是時亦為羅刹所擾

遂招撫羅刹米海羅等

二十一人

上命遞送米海羅等至京交戶部安插其烏槍及先投

誠羅刹之烏槍一併送至押解官兵過多恐致驛遞

勞苦令酌量派遣

四月己亥

命增給愛琿官兵行糧 將軍薩布素等請發今年四

月後官兵一年行糧戶部議照前給以半年俟
愛琿駐防兵家口到日停其給發

上諭官兵勞苦半年行糧全行給發

五月甲申

命將軍薩布素等取羅刹田禾 馬喇等奏臣至索倫
屢密詢羅刹情形皆云現在雅克薩尼布潮二
城各止五六百人其得以盤踞多年者惟賴額
爾古納河口至雅克薩十餘處雅克薩至布爾
馬夫河口十餘處築室散居耕種自給因以捕

貂尼布潮田畝不登但取資納米雅兒諸姓貢
賦喀爾喀巴爾呼人時販牲畜等物至尼布潮
尼布潮人亦捕貂與之交易得以生存至得冷
白地方耕種田畝無幾且不通水路麪食等物
雖零星負載亦不足恃及聞從尼布潮逃回之
布赫德云舊納米雅兒新納米雅兒托空卧兒
徹爾克吉兒巴林喀吉兒夸諾兒破塔噶兒巴
牙噶兒等八姓之人并我根特木爾黨內逃人
亦同彼遊牧艮河額爾古納河等處臣請

勅喀爾喀徹臣汗收其所部附近尼布潮者兼禁止交易再請

勅黑龍江將軍水陸並進作攻取雅克薩狀因取其田禾則羅刹不久自困而伊屬索倫俄樂春諸姓人亦難以竊據再遣輕騎勦滅似易

上諭據馬喇等奏取羅刹田禾當不久自困又侍衛關保來奏將軍薩布素等亦以取羅刹田禾爲然則羅刹盤踞雅克薩尼布潮惟賴耕種若田禾爲我所取誠難久存其令薩布素等酌議或由陸路進或水陸

並進盡刈其田禾不令收穫由陸路進以所刈之禾
投江下流水陸並進以所刈之禾船載以歸於未進
兵時先遣人傳示羅刹云爾等據我雅克薩尼布潮
多歷年所屬令撤還遷延不去且收我逃人侵我邊
民今大兵水陸進勦爾其速退以保餘生并如馬喇
等奏移文徹臣汗知之

臣秋濤謹案徹臣汗卽今車
臣汗部因其所屬之巴爾呼
人以牲畜與尼布潮之羅
刹交易故禁之以絕接濟

七月辛巳

命將軍薩布素等偵探羅刹情形 馬喇等奏臣等遣

打虎兒副頭目倍勒兒等偵探雅克薩城情形
路遇羅刹殺其二人生獲一人據生獲之費要
多羅云大兵未來之先雅克薩城已加修造昨
歲聞大兵進發城外復增木欄所在農人盡調
入城內打獵收貂亦皆罷止田禾未熟卽行刈
穫因今春不見兵至遂於旁卧一帶仍舊遣人
耕種昂古墨阿山頂設五人更番瞭望今夏自
尼布潮復增發四百人計見在雅克薩者約九
百人在尼布潮者不知其數雅克薩設丁壯八

十人耕種以收穫之糧支給兵食每月人各一
斗餘悉造房收儲一遇歉歲不能如數支給在
前豐歲僅僅足用今已增人量必不敷雅克薩
舊有船八艘吉禮過里等運糧前行被大兵擒
獲故雅克薩無船大兵未來於野諾西納城內
復造船二百艘各城派兵運糧不知兵數多寡
并運往何處吉禮過里黨內人逃回雅克薩云
大兵勢盛戰艦絡繹不絕衆驚失措今自尼布
潮增發人衆大兵進時不知時勢若何又據釋

歸之人云投誠者

聖主悉免死且加恩賞此外別無人至等語其生獲羅刹一并解送疏入

上諭雅克薩增發羅刹或欲侵害我虞人其移文薩布素等時加偵探相機以行倍勒兒等理藩院照例獎賞送到羅刹交戶部安插

十月甲辰

命運烏喇等處糧米於愛琿 將軍薩布素等請定官兵人數以便給糧戶部酌定人數并奏二年需

糧共計四千八百七十石有奇以見存四千五百七十石發給其不敷者藉愛琿人力將達呼爾所存米動支運往

上諭愛琿所需糧停其自達呼爾運往將烏喇米九百七十石見自等色屯轉輸伊屯門米一千五百石於明年冰解再發船一次運往

十二月乙巳

命選擇籐牌官兵

上諭兵部征勦羅刹所需籐牌官兵應分遣司員至山

東河南山西三省於安插墾荒福建投誠官兵內選
擇善用簾牌願行効力五百人令地方大臣給銀贍
其妻子兼爲整裝遣行又傳令八旗漢軍察明福建
等處投誠官兵內善用簾牌及滾被片刀者勿論主
僕開列職名并器具送部其在天津鄭克塽馮錫范
諸處亦遣人察取前項人員器具尋又

諭聞福建有雙層堅好簾牌移文提督施琅選取四百
并片刀速送至京毋誤軍機

康熙二十四年正月癸未

命都統公彭春等帥師勦撫羅刹 先是將軍薩布素

等奏大兵駐臨邊地宜水陸並進取羅刹田禾
但臣軍糧自六月初三日以次運到給糧治裝
約至初十始得啟行問羅刹降人俱言雅克薩
早熟諸禾被時漸行收穫今沂流而上值霖雨
之期江水泛濫無常陸路亦復泥濘縱令疾行
非一月不到是則取禾無及徒勞士馬况城池
廬舍修築未成迨至同時正值天寒難於興作
請暫停今歲興師俟來年四月內增兵進取雅

克薩城

上諭前馬喇等請取羅剎田禾朕令或由陸路進或水
陸並進相機舉行勅諭甚明及遣關保前往薩布素
亦云可行如果遵奉則我師不勞而羅剎自困今薩
布素等坐失機宜託故具陳殊屬不合且聞羅剎田
地肥沃收穫豐裕若異時兵抵雅克薩城下與之相
持又將以羅剎糧多難於卽克爲辭久稽時日其不
取田禾坐失機宜情節令薩布素明白奏覆 尋薩
布素等上疏引罪議政王等議于事平嚴議令

仍遵前

旨來年乘羅刹田禾時進兵

上命都統公瓦山侍郎果丕往黑龍江與薩布素等詳
議應否攻取雅克薩城并作何舉行擇其有裨於事
者以聞至是瓦山等與薩布素會奏我兵來年四月
杪水陸並進抵雅克薩招撫不行納款則攻其
城儻萬難克取卽遵前

旨毀其田禾以歸議政王等議如所奏復請

敕直隸山東山西河南巡撫每省派熟習火器兵二百

五十人并選賢能官各四員預備火器送京師
至日增發薩布素軍前協攻雅克薩城

上諭議政王等疏內不請發禁旅良是但直隸各省綠
旗兵未歷戰陣且黑龍江火器甚多不須增用朕意
選福建投誠善用籐牌官兵見在八旗及安插山東
山西河南者五百人付台灣投誠左都督何祐等率
往薩布素一應咨題多屬支吾借端延滯度四月進
兵不過刈取田禾事必無成此皆遣發黑龍江狂悖
之人從中阻議不欲成事薩布素出身微賤高視若

輩毋敢有違用兵所關甚鉅宜周詳籌畫期於必克
儻謀事草率復似明安達禮等退兵羅刹將益肆披
猖矣當自京城選賢能大臣一員統兵以行俟克取
雅克薩之日班師又發盛京兵五百人代黑龍江兵
守城種地出征兵還亦令還盛京種地事宜遣戶部
大臣一員督理羅刹所云早熟之穀卽地內春麥今
我兵亦多種春麥及大麥油麥霜降前六日皆得收
穫則不因師出曠一年田功簾牌兵給馬二千匹帶
往盛京盛京各佐領亦派馬二千照舊制嚴督飼秣

候京城馬到更代北行至馬喇等所養馬皆豫備於
齊查爾哈爾屯此間催趙月杪可到聞此路間有缺
水處不免貽誤今自盛京抵烏喇自烏喇經新設驛
站路直且近當從此徑抵黑龍江沿途馬匹或有倒
斃馬喇以所備者足數補送如此則我兵馬匹無虞
簾牌兵各給礮彈或十圓或二十圓以行其餉銀兵
月給二兩官月給三兩隨又

諭議政王等兵非善事不得已而用之向者羅刹無故
犯邊收我逋逃後漸越界而來擾害索倫赫真費雅

喀奇勒爾諸地不遑甯處剽劫人口搶擄村莊攘奪
貂皮肆惡多端是以屢遣人宣諭復移文來使羅剎
竟不報命反深入赫真費雅喀一帶擾害益甚爰發
兵愛琿扼其來往之路羅剎又竊據如故不送還逋
逃應卽剪滅今仰副

天心大兵逼臨雅克薩城姑再傳旨羅剎云前屢經遣
人移文命爾等撤回人衆以逋逃歸我數年不報反
深入內地縱掠民間子女搆亂不休乃發兵截爾等
路招撫恒滾諸地羅剎赦而不誅因爾等仍不去雅

克薩特遣勁旅阻征以此兵威何難滅爾但率土之
民朕無不惻然垂憫欲其得所故不忍遽加殲除反
覆告誡爾等欲相安無事可速同雅庫於彼爲界捕
貂收賦毋復入內地構亂歸我遁逃我亦歸爾逃來
之羅刹果爾則界上得以貿易彼此安居兵戈不興
儻執迷不悟仍然拒命大兵必攻破雅克薩城殲除
爾衆矣如此宣諭後羅刹果同雅庫爲界卽駐師於
愛琿設斥堠於雅克薩令疆圉帖然否則大兵酌量
進止不如此宣諭今縱克取雅克薩城我進則彼退

我退則彼進用兵無已邊民不安可否舉行爾等其詳議之於是議政王等奏言

上諭周詳遵此舉行甚裨於事統兵督耕大臣恭候

欽簡疏入

上命都統公彭春統兵護軍統領佟寶副都統班達爾沙參贊戶部侍郎薩海督耕彭春等抵黑龍江發往雅克薩城文書用黑龍江將軍印

丁亥給馬喇副都統銜

上諭大學士覺羅勒德洪等馬喇遣用以來殊爲効力

且頗知雅克薩諸地形勢其授副都統銜參贊軍務
詔責將軍薩布素等 戶部奏黑龍江佐領鄂色等言
耕牛倒斃已盡農器亦有損壞今時近東作遣
理藩院官一員同馬喇如數購買耕牛送往農
器令薩布素等營造豫備

上諭薩布素等故毀農器盡斃耕牛其意在多方遲延
冀撇離黑龍江耳凡受事者各宜殫心豫籌以期有
濟詎可諉之於上賴朕一切留意悉加區畫不致廢
弛儻謂責有攸歸竟倚任之定誤軍機宜卽嚴治念

見同大兵進勦姑暫停處分俟同自雅克薩日再議
戊子以科爾沁貢物犒黑龍江師

上諭議政王等科爾沁十旗今年進貢牛羊諸物不必
來京其全送黑龍江軍前仍記數奏聞照進貢例賞
資理藩院卽傳令科爾沁知之

命鑾儀使侯林興珠等率籐牌兵會勦羅刹 兵部奏
察取善用籐牌者鑲黃旗咨送鑾儀使侯林興
珠應否發遣恭候

上裁又遴選上三旗兵一百七十人山東等三省官一

百五人兵三百九十五人何祐尙未至應於官兵內委用首領幾員各約束本省人前往上三旗各遣漢軍官一員暫爲管轄

上諭黑龍江軍糧關係緊要務籌永遠充足發往黑龍江管轄籐牌兵之官過多官量行派遣兵用四百名足矣且近冬時籐牌兵在彼無事每百人一次自蒙古地方馳驛發回不久卽到庶軍糧不致耗費議政王等其詳議以聞議政王等議選派官二十員兵三百八十名共足四百名之額兵部給官印劄以

便約束令林興珠及何祐統兵以行上三旗各
派漢軍賢能官一員管轄赴盛京付公彭春
等率之進勦何祐至馳驛速去

上報可仍於官員外派足兵四百名尋

諭大學士覺羅勒德洪等林興珠曾効力行間且係侯
爵其令參贊軍務朋春等善視之

二月癸卯

命送籐牌片刀於烏喇先是兵部以福建送至雙層
籐牌三十單層籐牌三百七十呈

閱

上諭簾牌稍薄雙層者加舊綿一層單層者加舊綿二層
層庶堅固可用官兵卽於誥朝就道侯林興珠與營造司
郎中佛保監修進式後速發尋簾牌修畢兵部奏并福建送
至片刀四百遞解至烏喇公朋春等同侯林興珠酌量齎行

上諭遞解簾牌關係緊要爾部派賢能官一員送至盛京
盛京工部派賢能官送至烏喇

丙午

命賞賚何祐 兵部奏何祐至

上命內府給祐白金及堅厚絛甲於十八日啟行

四月乙未

命自墨勒根至雅克薩設立驛站

上諭議政王等愛琿兵於是月起行五月中旬可至雅克薩城凡奏報軍機自雅克薩至額蘇里經愛琿前來恐迂道遲延令理藩院侍郎明愛於杜爾伯特扎賴特派兵五百人并索倫兵酌自墨爾根至雅克薩設驛奏軍機庶免貽誤明愛往來覺察驛夫糧食匱

前丁有司 卷一百一
下
乏以索倫所貯米支給愛琿以內每驛原設二十人
應核減一半并入蒙古若蒙古兵五百人過多再爲
核減索倫効力勤勞傳諭異日加恩以示鼓勵

戊戌

命獎賞達呼爾副頭目倍勒兒等

臣秋濤謹案黑龍江外紀云布特哈初設

索倫達呼爾總管二員副總管八員謂之打牲頭目副頭目則此副頭目卽今之副總管也

馬喇等奏

臣

等今年正月二十八日遣打虎

兒副頭目倍勒兒等率三十餘人往雅克薩城
北務擒其生口并詳勘情形以報三月初五日

倍勒兒等生擒羅刹七人同云雅克薩城垣廬
舍如故又據生擒羅刹噶瓦力喇等云去歲雅
克薩城內設立重木中實以土聞大兵至額蘇
里卽遣人各處求援援兵千人今年二月前隊
已至後隊未來去歲新到頭目額禮克謝傳諭
人衆大兵來此皆爾等殺掠所致自後再聞有
侵擾索倫打虎兒者定行誅戮是以我等往來
不敢持軍器前者釋同二人已送往國主處迄
今未得主命雅克薩兵衆不滿千人後增發者

未知其數等語生擒羅刹逸去一人見在六人
遞送至京

上諭倍勒兒等直抵雅克薩探其情形生擒羅刹可嘉
所司如例獎賞其送至六人各給時服一襲送將軍
薩布素處俟大兵進勦時示以寬大之意悉行釋放
六月癸巳侍郎明愛等奏官兵克雅克薩城
都統公朋春等帥師進發五月二十二日抵雅
克薩城下宣諭

皇仁浩蕩不忍加誅令還本境羅刹仍恃巢穴堅固遷

延不去二十三日分水陸兵爲兩路列營夾攻
復移置火器二十五日黎明急攻之城中大驚
羅剎頭目額里克舍謝等臣秋濤謹案盛京通志作額里克舍一作額里克謝勢迫詣軍前稽顙乞降於是朋春等復
宣諭

皇上好生之德釋回羅剎人衆其副頭目巴什里等四
十人不願歸去因留之我屬蒙古索倫逃人及
被擄者咸加收集雅克薩城以復明愛等遣人
馳報會

聖駕幸拜察在道理藩院尙書阿爾尼奏

聞

上顧阿爾尼曰征勦羅剎衆皆以路遠爲難朕獨斷興師致討今荷

天眷遂爾克之朕心嘉悅爾以捷音傳知諸王大臣既至

行宮駐蹕恭親王常甯等率文武官員請慶賀

上遣阿爾尼同兵部侍郎佛倫傳

諭曰治國之道期于久安長治不可圖便一時當承平

無事朕每殫心籌度卽今征勦羅剎之役似非甚要而所關甚鉅羅剎擾我黑龍江松花江一帶三十餘年其所竊據距我朝發祥之地甚近不速加剪除恐邊徼之民不獲甯息朕自十三歲親政卽留意於此細訪其土地形勝道路遠近及人物性情以故酌定天時地利運餉進兵機宜不徇衆見決意命將出師深入撻伐然兵貴相機而動變化無窮惟恐諸將不遵朕指授致失機宜今收復雅克薩地得遂初心至於撫綏外國在使之心服不在震之以威近遣親隨

侍衛關保等往軍前諄諭之曰兵凶器戰危事古人不得已用之朕以仁治天下素不嗜殺爾其嚴諭將士毋違朕旨以我兵馬精強器械堅利羅剎勢不能敵必獻地歸誠爾時勿殺一人俾還故土宜朕柔遠至意茲一一奉行朕甚嘉焉諸王大臣奏征勦羅剎衆皆難之我

皇上爲根本計獨斷興師羅剎歸誠雅克薩收復悉如脣算不爽毫髮誠非臣等淺近之人所能仰窺萬一也且前獲羅剎不加誅戮迨大兵壓境又遣關保

等嚴諭將士誠以勿殺

皇上好生之德覆被天下匪獨羅刹戴

恩海外諸邦莫不傾向

聖化臣等合行慶賀阿爾尼等進奏畢復出傳

諭曰朕思凡事必周詳審度方收實效不可苟且從事
向者尙書明安達禮輕進至糧餉不繼將軍沙爾呼
達巴海等失計半途而歸遂致羅刹驕恣而我索倫
奇勒爾俄樂春等亦懷疑貳朕詢其失機原委一一
籌畫乃獲奏功兵法云多算勝少算不勝詎可忽視

且兵貴神速前逆賊吳三桂叛朕思岳州係湖廣門戶遣人指示速戰始克岳州遂一面進取四川以分賊勢一面密諭大將軍賴塔從廣西趨雲南於是諸省底定兵革休息然亦在將軍等奮勉効力儻怠忽不奉行雖有良策亦何益焉所以平定雲南賴塔之功最大縱有他過爲人控告朕究不加罪諸王大臣奏三逆叛時在外將士皆與賊相持進取無期

賴

皇上神謀內運決勝萬里恩威並用勦撫兼施所以負

固巨孽刻日誅鋤又俯念賴塔有功曲

賜保全凡効力行間者皆歡忻鼓舞而臣等亦莫不感

戴

殊恩矣

上復諭曰前關保奏云我兵擬於四月二十八日水陸
進發先期雷雨大作至二十六日江水泛溢又風逆
舟不得前及二十七日天晴水落二十八日平旦忽
轉順風我兵揚帆溯流直上三日之程一朝而至陸
路之兵雖疾行不及也又駐劄愛琿兵適當肉食匱

乏忽有鹿數萬自山趨下騎者馳射步者挺擊及駕船筏于江中截獲者計五千有餘朕觀此二事豫知可以奏功因事未就姑秘不發今旣蕩平故傳諭爾等知之諸王大臣等奏

皇上仁政上合

天心故顯垂鑒佑

國祚綿永萬年無疆之休於此可卜

上允行禮於是王等率文武官員行三跪九叩頭禮尋

朋春等捷奏至

上諭覽卿奏官兵星馳直逼雅克薩城下示以威德招撫羅利免死放歸克復其城深爲可嘉在事人員從優議敘投誠羅利巴西里等安插盛京其被擄之索倫達呼爾人衆仍各發回原地有喀爾喀厄魯特人口俱察送到部給發本主

七月壬申

命自烏喇吉林至愛琿設立驛站 先是郎中包奇等奏自烏喇吉林至愛琿計丈量共一千一百九十五里應設十四驛

上諭驛遞關係緊要凡丈量當以五尺爲度今程途太遠令包奇等再馳驛前往詳加丈量至是包奇等奏自烏喇吉林城至愛琿城以五尺細丈共一千三百四十里應設十九驛

上報可復令每驛設壯丁並撥什庫三十名馬二十四牛三十頭壯丁自

盛京甯古塔所轄各驛柳條邊派出馬牛令

盛京戶部照數採買送往

己卯

命釋放被擒羅刹宜番等 將軍薩布素等奏無底兒

河羅刹鄂衣多里遣宜番等四人來誘俄樂春

立克頂格等被擒送到

上諭羅刹宜番等應卽正法但大兵攻克雅克薩勢迫
來歸之羅刹旣悉加寬宥不行誅戮今宜番等亦免
死曉以前此釋歸羅刹之故并用羅刹字作書令彼
送還我吉爾蒙阿等毋得再犯邊境其書卽給與宜
番等持去立克頂格等所司照例獎賞

八月乙巳

命賞賚征勦羅刹藤牌兵 兵部奏侯林興珠及何祐
等至日旗下兵丁各歸本旗其自山東山西河
南調至者令本省官約束以行何祐仍發回原
安插處

上諭藤牌官兵勤勞懋著官員俟後議敘兵丁令戶部
以白金賞賚之

九月乙丑

命甯古塔協領納秦爲愛琿副都統 時愛琿副都統
雅齊納緣事革職故以納秦代之

甲申

命駐兵於黑龍江墨勒根地方 先是

上諭大學士覺羅勒德洪等羅刹侵我邊陲於俄樂春
索倫赫真費雅喀擾害居民甚至搶擄人口頻行肆
惡朕不忍輒動兵戈數遣使宣諭羅刹仍恃遠抗拒
侵邊擾民殆無甯息乃發大軍直抵雅克薩城下勢
迫始行乞降統兵將帥復遵朕旨宥罪釋歸四十年
盤踞之衆數日卽行擊破收復雅克薩城今旣告成
功薩布素等前此緩兵不進等罪概行赦免進征官

兵勞苦暫回烏喇吉林量撥盛京達呼爾等處官兵
暫爲鎮守至雅克薩城雖經克取防禦斷不可已應
於何處永駐官兵伊桑阿及耶坦往薩布素處詳加
定議以聞築城等事與馬喇相度議畢令馬喇偕來

至是伊桑阿等奏

臣等遵

旨自納木爾河口至溫察爾屯詳勘山野空曠多可耕
之地其間空郭爾進屯與黑龍江近應築城至
駐防黑龍江之烏喇甯古塔兵五百人及水手
人役又駐防訥木爾兵及家口俱於明春一同

啟行築城照黑龍江例

盛京副都統一員兵六百人匠作酌量派出同築城器具帶往於明春抵訥木爾并力修造再勘墨勒根附近處有嫩江岸之墨勒根屯可以築城俟訥木爾駐防兵收穫田禾一次墨勒根設兵築城事宜所司請

旨

上命議政王貝勒大臣集議議政王等奏言築城設兵等事均如所請黑龍江地方緊要且有船艦火

礮等物應發甯古塔兵五百人駐防者不足精選烏喇兵增發其駐防墨勒根兵應停止先派定發往訥木爾兵一千人令增發駐防於空郭爾進

上諭所議尙未周詳止以甯古塔兵發黑龍江不合應以先流徙甯古塔烏拉罪人并發再行明白確議於是議政王等復奏察墨勒根較空郭爾進緊要空郭爾進築城其令停止於墨勒根築城設兵令將軍薩布素及副都統一員駐劄於此黑龍

江設副都統一員其駐防五百兵以烏喇甯古塔兵參用先流徙甯古塔烏喇罪人俱入兵數發往今於墨勒根設兵自須增驛令戶兵兩部理藩院各遣官一員自烏喇吉林至墨勒根自墨勒根至黑龍江宜增幾驛定議具奏駐防黑龍江副都統鑄印信給之副都統溫岱納秦孰令駐防黑龍江孰令築城恭候

欽簡

上允行令溫岱納秦駐防黑龍江副都統博鼎築城築

城兵丁各再量增夫役兼令種地

臣秋濤謹案
墨勒根地所

築之城卽今
墨爾根城

朔方備乘卷首六

知縣周錦心初校
舉人張銓覆校

朔方備乘卷首七

欽定書三

平定羅剎方略三

康熙二十五年二月甲午

命發籐牌兵及礮具至黑龍江軍前

上諭兵工二部黑龍江軍前需用火藥礮子所關最要
俟青草時派上駟院太僕寺駱駝二百匹量發火藥
礮子及新鑄之礮再選籐牌兵百人付班達爾沙郎
坦率往令內府佐領護軍校滿金奇宜番等偕行

戊戌

命將軍薩布素等帥師進攻雅克薩城 先是薩布素

奏驍騎校碩克色等往探羅刹情形據回言職

至旁臥地方因人少馬疲未抵雅克薩而還途

遇奇勒爾慶定吉爾云羅刹復來雅克薩築城

盤踞臣請於冰消時督修船艦親率官兵相機

進剿

上以薩布素所奏乃傳聞之言并非遣人親抵雅克薩
偵取確音不便遽爾用兵因令薩布素及理藩

院郎中滿丕等確探情形以聞至是滿丕奏臣
遣索倫副頭目烏木布爾代等抵雅克薩城生
擒羅刹鄂克索木果訊之云去歲尼布潮臣秋
濤謹
案尼布潮頭目宜番臣秋濤謹案此又一宜
番非前投誠之宜番也令
大兵釋歸之額禮克謝率五百餘人復至雅克
薩依舊址築城其城夾木爲之中實以土寬一
丈五尺高一丈木外瑾之以泥及訊以糧米可
食幾月又云所獲足支二年疏入

上諭今羅刹復回雅克薩築城盤踞若不速行撲勦勢

必積糧堅守圖之不易其令將軍薩布素等姑停遷
移家口如前所請速修船艦統領烏拉甯古塔官兵
馳赴黑龍江城至日酌留盛京兵鎮守止率所部二
千人攻取雅克薩城併量選候補官員及見在八旗
漢軍內福建藤牌兵四百人令侯林興珠率往

四月庚寅

命郎坦等參贊軍務 時

上以郎坦班達爾沙馬喇諳悉地形令赴黑龍江軍前

復

諭兵部曰郎坦等旣因諳悉地形遣往俱令參贊軍務

七月乙巳

命免索倫達呼爾一年貢賦

上諭兵部理藩院曰我兵圍困雅克薩城羅刹勢迫死
守今時序漸寒自墨勒根至雅克薩所設蒙古驛馬
冬月飼秣維艱其免索倫達呼爾今歲貢賦俾之飼
秣并修整器械以備調用至蒙古每驛應設夫馬若
干令明愛馬喇等定議移文索倫總管洪吉郎中滿
丕等如數取用索倫達呼爾夫役與備養之馬又博

鼎率往築城種地官兵內選二百人俱暫留墨勒根
亦候調用餘悉遣還

己酉

命宣諭鄂羅斯察罕汗

上諭議政王等向者羅刹侵犯雅克薩尼布潮諸地戕
我居民邊境騷然曾諭鄂羅斯察罕汗來使尼果來
等撤回其眾自後竟不復奏反在在侵犯肆行擾害
意尼果來未達前旨於察罕汗復令被擒羅刹持書
從喀爾喀地宣諭之亦不覆奏因遣發官兵往雅克

薩招撫羅剎不戮一人令其頭目額禮克謝等持書
歸去羅剎聞我師言旋復回雅克薩築城以居朕思
本朝頻行宣諭曾未一答而雅克薩羅剎又死守不
去或尼布潮諸地阻隔前書未達或雅克薩羅剎皆
彼有罪之徒不便歸國俱未可知今問荷蘭國貢使
稱伊國與鄂羅斯接壤語言亦通其以屢諭情節備
悉作書用兵部印付荷蘭國使臣轉發鄂羅斯察罕
汗處收回雅克薩尼布潮羅剎於何處分立疆界各
毋得踰越則兩界民人均得甯居不失永相和好之

意察罕汗覆奏時令其使由陸路直來若陸路難通
卽以來疏付荷蘭國代奏再依此書發西洋國轉達
之

八月丁丑

諭將軍薩布素等戰守機宜

上諭薩布素等曰今天時漸寒河流將結宜每事籌畫
豫爲之備觀羅刹死守雅克薩城必待援兵之至且
冀我兵於流澌時撤回耳目前我兵雖掘濠防禦至
隆冬冰合後船艦若何收藏馬匹若何飼秣敵兵來

援若何撲勦勿令入城爾等其詳加籌畫密以奏聞
尋薩布素等奏臣等凜遵

諭旨已於城三面掘濠築壘濠外置木椿鹿角分汛防
禦城西對江另設一軍若截江之東西以泊船
水險難停恐未流澌時江路有羅刹逸出尼布
潮來援復派勦禦之兵於東西兩岸泊船備之
離城六七里上流有港流澌時卽藏船於內另
設一軍守護兼令堵尼布潮援兵至軍中馬匹
有疲羸者一半發愛琿一半發墨勒根令駐彼

盛京官兵飼秣疏入

上諭發墨勒根馬匹之半如交駐彼盛京官兵則更費食糧可令索倫總管洪吉等飼秣盛京官兵仍行遣還其發愛琿馬匹之半卽令愛琿官兵飼秣

命副都統博鼎率兵赴將軍薩布素軍前 先是博鼎請率築城官兵二百人進勦事下薩布素等議至是薩布素奏臣等統率二千一百人所在防禦兵力尙單得博鼎增兵前來殊有裨益

上因命博鼎精選築城及種地官兵二百人賚二月食

糧速赴薩布素等軍前令其參贊軍務

九月己酉

命解雅克薩圖 時鄂羅斯國察漢汗遣使上疏其畧

云謹奉

上撫御華夏洋溢寰區率賢臣共圖治理分任疆土滿
漢兼統聲名遠播

大聖皇帝曰向者父阿列克席米汗羅爲池曾使尼果
來等賚書至

天朝通好以不諳中國典禮語言舉止鄙陋無文望

寬宥之至頌揚

皇帝之處舛謬失體亦因地處荒遠典禮素昧所致幸
勿見罪

皇帝在昔所賜之書下國無通解者未悉其故及尼果
來歸問之但述

天朝大臣以不還逋逃根特木爾等騷擾邊境爲詞
近聞

皇帝興師辱臨境上有失通好之意如果下國邊民構
釁作亂

天朝遣使明示自當嚴治其罪何煩輒動干戈今奉
詔旨始悉端委遂令下國所發將士到時切勿交兵恭
請察明我國作亂之人發回正法除嗣遣使臣
議定邊界外先令米起佛兒魏牛高宜番法俄
羅瓦等星馳賁書以行乞撤雅克薩之圍仍詳
悉作書曉諭下國則諸事皆寢永遠輯睦矣疏
入

上諭鄂羅斯國察漢汗以禮通好馳使請解雅克薩圍
朕本無意屠城欲從寬釋其令薩布素等撤回雅克

薩之兵收集一所近戰艦立營并曉諭城內羅刹聽其出入毋得妄行攘奪俟鄂羅斯後使至日定議

康熙二十六年正月戊子

遣醫視軍士疾

上諭將軍薩布素等自雅克薩城解圍以來聞軍士間有患疾者此皆屬滿洲精兵朕甚憫焉今特遣醫二人賁藥調治之至羅刹雖與我對壘但我兵攻雅克薩城從未誅戮其人如城中有患疾之羅刹亦聽其就醫使還彼國傳布德意

七月戊子撤雅克薩官兵還愛琿墨勒根 先
是喀爾喀土謝圖汗奉

上諭偵探鄂羅斯國分界使臣消息至是土謝圖汗奏
鄂羅斯國使臣已抵臣境

上因命薩布素等統率官兵乘天時未寒還至愛琿墨
勒根修整器械休養馬匹以度隆冬仍於要地
設斥堠并以察漢汗遣使請和撤還大兵之故
曉諭雅克薩城內羅剎知之

朔方備乘卷首七

知縣丁紹基初校
舉人張銓覆校

朔方備乘

卷首七

平定羅剎左壁

八